

simoque habentur pretio, si vestes sericas ac byssum excipias, quibus caret; abundat autem carne vaccina ac porcina; equos generosos ac totius Sinæ optimos producit, uti & vicina Suchuen provincia; argentum vivum nullibi quam hic manat copiosius.

Prima Urbs seu Metropolis

Q V E I Y A N G.

Metropolis hujus territorium reliquis utcumque planius est Provinciae partibus, proindeque frequentius habitatum: antiquo tempore Sinany regionis hujus populus dictus est, hoc est barbari ad Notolybicum, quia hunc situm habet hæc terra respectu Sinæ antiquæ; pertinebat autem ad Louquei antiquissimum regnum. Sub Hana familia ab Hiaouvo Imperatore subactum est, institutaque dynastia Ciango. Sunga familia iterum redegit in Provinciam, magnumque militum præsidium exædificatæ à se civitati imposuit; Juena familia, quia facillime hæc terras occupavit, Sunjuen dixit, hoc est favens Juena; Taiminga familia hodiernum nomen & dignitatem urbis dedit, eique munimenta undeviginti loco civitatum subesse voluit, quamvis ex iis plurima civitates aut æquent aut superent magnitudine, 1 Queiyang, 2 Kinkiu, 3 Moqua, 4 Taho, 5 Chingfan, 6 Gueifan, 7 Fangfan, 8 Hungfan, 9 Golung, 10 Kinxe, 11 Siao lung, 12 Lofan, 13 Talung, 14 Siao ching, 15 Xangua, 16 Luxan, 17 Lufan, 18 Pingfa, 19 Mohiang.

Plurimas gentes hic enumerant Sinæ, quæ olim in hisce terris habitabant, quibus varii fuere mores, quos referre nimis longum esset: sub Taiminga familia primum studia ac mores Sinicos admiserunt, unde non pauci etiam doctorum gradum sunt adepti. Tartari Juena familiae extra urbis mœnia ad Australem partem templum satis magnificum ædificarunt.

Montes. Tungeu mons cupreum tympanum dicitur, quia, cum pluvia imminet, in eo auditur tympani pulsus; ad ortum urbis est.

Nanuang mons altissimus, ac in recessu abditus, ad Boream: urbis rari illum audent conscendere, ob nimiam asperitatem.

Venpi mons ad austrum urbis, solus per se stat, trianguli isoscelis figuram acutissimo vertice in altum sublato refert.

Flumina. Nihil admodum de fluminibus occurrit,

præter fontem dulcissimum ac pellucentem ad urbis Notapeliotem, decidit aqua intra fossam sex cubitorum, numquam autem ea crescere notatur, aut minui quantumvis inde hauseris.

Secunda Urbs

S V C H E V.

Cina familia prima fuit, sub qua fit hujus territorii mentio, tumque Kinchung dicta est; Hana Vulin regioni adnumeravit; Tanga primo hunc locum Sucheu appellavit, deinde Ningii; sub Taiminga urbis titulo donata est: quatuor sibi subdita regit munimenta, 1 Sucheu, 2 Tufo, 3 Xiki, 4 Hoangtao.

Abundat hæc regio mercurio, optimo cinnabari, aliisque. hujus regionis monticolæ plurimum delectantur robore, audaces sunt, litteras nesciunt, contractus tamen suos nescio quibus notis in tabellis ligneis exprimunt, in periculis ac difficultatibus ad fortilegium tegularum frustra adhibent, demonibusque sacrificia offerunt, ut mala avertant: sparsos habent capillos, pedibus incedunt nudis, durosque adeo callos induunt, ut nec saxa nec spinas calcare timeant; quia tamen comes sunt ac urbani, aliquo modo Sinicam linguam jam admiserunt, ac tamen si exteros suos mores retineant, non tamen adeo barbari sunt ut reliqui: ita fere eos depingit Sinicus auctor, quibus ego quod addam parum aut nihil habeo.

Go mons fossæ urbis vicinus est ad Australem partem, vix adiri aut lustrari potest, adeo præceps ac præruptus est: ad occasum mons Tienying visitur.

Tertia Urbs

S V N A N.

Hæc regio jam ab antiquis retro temporibus præcipue Sinis fuit subdita, accensitaque regno Çu: Cina familia extinctis regibus, vocavit Kinchung, Hana Vulin regioni adscripsit, Suius Vucheu, Tanga familia Sucheu civitatem dixit, at Taiminga familia Sunan, quæ & urbis titulum statuit. Subsunt ei civitates binæ, & quinque munimenta, 1 Sunan, 2 Vuchuen, 3 Inkiang, 4 Xuite, 5 Manii, 6 Langki, 7 Jeuki.

Vanxing mons ad Australem urbis partem

Montes.
tem